

東
華
續
錄

東華續錄

咸豐十五

臣王先謙敬編

臣陶澐宣蒸校

五月辛亥朔諭內閣鄒鳴鶴奏查明守城擊賊之出力文武紳士兵丁請旨獎勵分別開單呈覽一摺本年粵西逆匪攻撲省城曾經降旨令賽尙阿鄒鳴鶴於賊匪解圍後將出力人等覈實保奏茲據鄒鳴鶴具奏朕詳加披閱人數太多過於冒濫且此次圍城賊眾雖經疊次攻擊並未大受懲創仍復全數北竄豈得以郡城圍解視爲奇功鄒鳴鶴所稱擊退賊匪殊屬失實惟念該文武員弁等保守城池一月之久亦未可沒其微勞著賽尙阿將單片內所開各員逐一確查覈實酌獎並著勞崇光一體查覈不准任意濫保致滋虛冒至於在籍紳士本無守土之責該員等同心協力

登陣守護自應量加獎勵著賽尙阿一併查明覆覈酌保候朕施
恩○諭布彥泰奕山奏庫存回布壅積過多請暫停徵運一摺伊
犁庫存回布連起運在途多至四十萬餘匹每年需用不過二萬
匹若不及早變通必致積久虧朽著德齡會同奕山等查明葉爾
羌喀什噶爾和闐等城每年回戶布匹正賦應如何變通折徵仍
不至苦累回戶悉心籌議奏明辦理其塔爾巴哈台分運布匹著
卽暫行停運○王子諭內閣朕在沖齡仰蒙 康慈皇貴太妃撫
育深恩前已加崇稱號錫爵推仁上年並諭令在京王公文武官
員於每年 慈壽之辰及前後三日均穿蟒袍補褂用示尊崇惟
念國家典禮攸關一切祇遵 成憲且 皇貴太妃懿德淵冲每
懷謙抑若必遂朕一人忱悃轉非所以仰體 慈懷茲於五月十
一日恭逢 皇貴太妃慈壽著在京王公文武官員俱穿蟒袍補

袞一日庶於因時制禮之中仍不失率由舊章之義嗣後每年卽著爲例○諭程喬采奏逆匪逼近楚界請飭粵兵跟追並調回楚兵堵禦一摺據稱探聞廣西全州城垣被逆匪轟陷賊蹤距楚界甚近見在永州鎮總兵孫應照等防守楚粵交界之黃沙河提督鮑起豹早經移紮永州見於水陸兩路嚴密設防自應厚集兵力以期堵剿兼施著賽尙阿勞崇光迅將前赴廣西援剿之楚兵酌量撤回湖南俾資調遣並迅飭綏靖鎮總兵和春及廣西各路兵勇兼程前進與湖南弁兵合力夾擊程喬采惟當嚴飭在事文武實力巡防儻賊蹤竄近卽令迎頭奮擊以遏賊氛毋稍延誤○諭軍機大臣等據程喬采馳奏逆匪攻陷全州賊氛愈近楚疆一摺此時賊勢直趨永州湖南官兵因救援廣西省城陸續調往見在程喬采於水陸兩路設防殊覺兵力單薄必須廣西兵勇兩面夾

擊該大臣前奏擬由省城酌量移營前進見值楚邊緊要著卽迅速移營就近調度廣西省城賊氛甫退防剿事宜不可稍懈勞崇光已授廣西巡撫責無旁貸著卽通盤籌畫相度情形或應畱省督剿或應出省應援隨時與賽尙阿商辦合力同心以期共濟該大臣仍飛飭各路將弁督帶兵勇或由間道繞至賊前或跟蹤緊追使賊無暇喘息總以力遏賊鋒勿致蔓延楚境是爲至要前已疊次諭令向榮帶兵出省見在逆匪逼近湖南未知該提督聞之亦復激發天良否也至全州失守在城文武如何下落著卽查明具奏徐廣縉如抵粵西卽可專辦剿捕事宜該大臣此時應以楚境爲重若能乘賊分竄兩路痛加剿洗仍可轉敗爲功懷之將此由六百里諭令知之○諭逆匪圍攻全州暗用地雷遽將州城轟陷擄馬擄船水陸並進兇餓益張見距楚粵交界之黃沙河僅二

十餘里又大張僞示欲直撲長沙湖南民情浮動衡永一帶尤會匪充斥之地難保不暗與勾結該督等務當嚴飭地方官密爲查拏豫防土匪乘間竊發全州與湖南水陸兼通水路尤關緊要或設法阻其行舟或於要害地方密置兵船暗藏槍礮截擊尾追俾匪船不能順流直下方爲萬全至楚粵交界見已諭令賽尙阿督飭和春並帶兵將弁跟蹤緊追鮑起豹已移紮永州儻該逆竄入楚境該督卽飛咨該提督率同鎮將與粵西帶兵大員同心協力前後夾攻以期一鼓殲除毋誤事機所調四川江西各兵如緩不濟急應如何變通調撥之處仍隨時與賽尙阿咨商辦理該督片奏儻賊氛竄近必須移護長沙等語此事尤須慎重衡州爲入省要路該督駐紮此處正可控制全省阻其入省之路並可隨時與賽尙阿咨商機宜儻一有移動則衡永一帶人心惶恐卽全省亦

不免震動所關非細該督務須酌量情形通籌全局不可輕於移動全州文報不通所有廣西摺件業已改道卽著分飭各州縣安速飛遞毋稍遲誤湖北與湖南緊連該督仍當隨時知會龔裕嚴拏匪徒豫爲防範仍不可稍涉張皇以安人心將此由六百里諭知程裔采駱秉章並諭令龔裕知之○諭本日據程裔采馳奏廣西全州失守賊氛逼近楚疆請添兵堵剿一摺前因逆匪紛竄疊次諭令徐廣縉選帶精兵馳赴廣西會同賽尙阿迅籌剿辦見在逆匪攻陷全州情形極爲喫緊若不痛加剿洗必致蔓延楚粵賊勢益張徐廣縉奉到前次明降諭旨諒已督兵前進此時賽尙阿已督兵由桂林馳赴楚境勞崇光已補授廣西巡撫該督到粵西後卽專辦該省剿捕事宜湖南兵勇多已調赴廣西見經程裔采咨調回楚恐一時不能趕回衡永之閒萬分緊要我兵但知尾追

並無迎擊如能選派勁兵取道南雄州由郴州桂陽繞出永州據賊前路迎頭截擊亦出奇制勝之一策是否可行酌量調度葉名琛業經出省所有羅境股匪卽著責成督剿該督撫等惟當同心協力殄滅妖氛剋期蒞事見在廣西湖南兩省兵餉均關緊要該督撫自必豫爲籌畫先其所急無俟朕諄諄諭及也將此由六百里諭令知之○湖廣總督程喬奏全州失守賊氛逼近楚疆前調楚兵經廣西巡撫鄒鳴鶴堅畱桂林未經派出得旨鄒鳴鶴可恨之至又奏桂林固屬重地而全州亦係藩籬此中一判重輕不免迹分畛域批鄒疆大吏猶能籌畫及此而本省巡撫置之不顧真無天良也又片奏密陳粵匪叵測情形擬請移護長沙省城又批覽奏曷勝憤悶雖徵調鄰省可資堵剿第恐緩不濟急奈何○甲寅夏至祭地於方澤恭奉宣宗成皇帝配享如配天儀

○召駱秉章來京調張亮基爲湖南巡撫以黃宗漢爲雲南巡撫
易棠爲甘肅布政使長臻爲陝西按察使

由河南河北道遷

○乙卯諭內

閣徐廣縉等奏勦辦廉州股匪連破賊巢一摺前據賽尙阿奏稱
生擒首匪蘇凝三茲據該督等奏擒獲蘇凝三之後卽飭該道沈
棣輝等查探賊首李士青屯踞那瀉夥匪張幗榮藍大屯踞分界
李士芳阮亞丁屯居那練廣東官兵移營宿木山約會廣西遊擊
雙貴移營下坡村先勦那瀉賊巢都司張遇清等伏勇底砮山堵
那練賊匪來路並飭那添壯練分路牽制絕其應援兩省兵壯齊
抵賊巢柵外參將劉開泰首先拔柵破寨兵練一齊擁入將張幗
榮藍大擊斃賊巢屋柵全行平毀又出巢救應之賊亦經張遇清
等截殺多名惟首匪李士青逃入那練見在沈棣輝等營約會雙
貴進勦該督等仍嚴飭鎮道將弁乘勝迅將首匪李士青拏獲懲

治務使廉州一帶伏莽盡除毋畱餘孽所有此次出力之文武員弁著於拏獲李士青後一併查明保奏候朕施恩○諭前因廣西軍務未竣能否舉行鄉試降旨令鄒鳴鶴體察情形迅速覆奏茲據奏稱見因逆匪竄據道路尙多梗阻且各屬士子董率團練協助官兵保衛地方勢難如期應試等語所有廣西省辛亥恩科文武鄉試本改於今年壬子正科一併舉行見在軍務尙未完竣自應再加體恤著改於明年特開一科仍倍額取中並予廣額下科會試加中額數著禮部屆期奏明請旨○諭軍機大臣等浙江鄞縣梟徒糾集多人拒捕戕官與鄞縣奉化兩縣鄉民圖減糧價滋鬧之案本屬兩事常大溜派員帶兵前往辦理本未詳慎茲據季芝昌奏稱當以解散脅從安撫良民爲首務並繕發印示專差遊擊張從龍帶往曉諭又挑備精兵恩威並用所辦甚合機宜見在

浙江派員辦理如已妥協固毋庸議儻該梟徒等始終怙惡甚至與鄉民狼狽爲奸情同叛逆著該督酌量情形如須親往督辦卽帶見調官兵馳赴浙江相機調度務期首要就擒盡法懲辦而良民亦不至驚擾被累方爲妥善將此諭令知之○丙辰賽尙阿奏接和春稟該逆於全州城下開挖地道安放火藥十六日巳刻火發城裂賊眾一擁而入該兵丁乘亂逃出城中文武各官不知存亡旋據續報十八日早探得該逆全數竄出州城勢欲由河順流北竄和春親督各兵勇用劈山礮向河流釘塞處所徹夜轟打又密令弁兵潛燒賊船二隻該逆未能卽竄十九日黎明仍令兵勇分路攻剿賊船二百餘隻已在蓑衣渡江心泊如營壘兩岸安設大礮我兵一進賊槍礮如雨和春親督兵勇四路奮攻該逆亦死力拒敵數時之久臣惟有竭盡心力嚴飭將士激發天良並令和

春督率諸軍設法圍攻一面飛咨湖廣督臣程喬采速飭楚省防

兵迎前堵截扼其竄突前後夾擊庶匪勢不至滋蔓又奏據和春

劉長清等續報賊又竄逃各兵亟須追擊請將畱省楚兵全數撥

給以資得力並請將粵西省兵千四百名撥回防守省城一轉移

間於防剿兩得其宜臣復與撫臣商酌並告以臣見尙在省所帶

親兵千餘城外尙有東潮等勇即使土匪潛發亦尙足資鎮壓詎

該撫遣向榮之子向繼雄回稱仍以省城緊要城外各勇多不足

恃必須粵兵回至省城始允將畱省楚兵撥往計粵兵由全至省

然後楚兵由省赴全往返動須旬日軍情利害勢爭頃刻豈容如

此稽延臣萬不得已惟有飭令和春等仍將粵兵帶往追剿毋庸

專俟此項楚兵應用鄒鳴鶴一意阻撓全不通籌大局似此惶怯

情形實不足當封疆重任臣當此事機萬分喫緊之際動多牽掣

不敢不據實直陳又奏大營親隨文武各員相隨年餘崎嶇艱險
倍極勤勞臣當此軍務未竣曷敢爲該員等論功請賞惟該員等
辛勤日久實爲得力未忍掩其勞勩仰求 皇上天恩准加獎勵

上諭軍機大臣等見在賊蹤已逼近湖南道州永州等處勢仍
猖獗和春等帶兵追捕能否得力著卽嚴飭各路分督兵勇合力
攻截並飛咨程喬采兩路夾攻迎頭堵擊以期轉敗爲功勞崇光
前往興安等處昨已授爲廣西巡撫更屬責無旁貸該撫前在南
太用兵尙有謀略正可隨時幫同賽尙阿籌畫一切毋致再有疏
虞至該大臣酌保親隨文武各員該員等辛勤一載自不當沒其
微勞惟當此城池失陷之時忽然論功行賞殊不足以服人心已
將原奏摺單暫存軍機處俟大獲勝仗再行分別加恩將此由六
百里諭令知之○諭本日據賽尙阿馳奏廣西全州賊匪勢將他

竄極宜添兵追剿等語前已有旨著徐澤醇將前調四川兵二千名飭令迅赴湖南著再於松潘建昌兩鎮內挑選精兵各一千名並著調任河南巡撫李德於提鎮各標內挑選精兵一千名各備軍裝器械並派得力將弁管帶聽候調撥毋得遲誤將此由六百里各諭令知之○以全州被陷欽差大臣賽尙阿下部議處○戊午程喬采奏粵匪陷全州後由小路偷越於四月二十二日竄至永州城外旋竄零陵縣屬雙排係通道州大路雖有余萬清駐彼堵禦兵力尙單適綏靖鎮總兵和春由太平鋪統兵萬餘追至業經議定分爲兩路一由甯遠馳赴道州堵截一由雙排跟蹤尾追以期掃數殲滅又奏楚省藩庫支絀異常湖南見有軍需應請飭部籌撥餉銀並准先將截畱粵西解項暫行借動以應急需楚省兵旣單薄卽和春帶來兵勇恐亦不敷且事權亦難歸一可否飭

令賽尙阿帶領各兵移紮南省庶遣將出師可期及早蒞事又奏
准賽尙阿密函探得賊在全州擄船二百餘隻有無論全州攻得
與否卽欲直撲湘漢之謠萬一衡湘被其偷越關繫匪輕又准湖
北撫臣龔裕飛咨四月十八日省城揭獲偽示二紙填寫總理軍
機鎮守湖北地方大司寇郭偽銜內有天德年號見在密訪查拏
各等因臣兼圻責重晝夜籌思似未便株守一隅已將衡州防堵
並所調官兵逐一布置周妥卽於四月二十五日兼程進省與撫
臣暨各司道等會商籌辦以固根本而定人心 上諭內閣程裔
采奏粵匪竄至永州經官兵擊退大獲勝仗一摺粵西賊匪自攻
陷全州之後竄至永州城外經提督鮑起豹總兵孫應照兩面夾
攻該匪潰敗竄往零陵縣屬之雙排地方見在余萬清和春分路
進剿著賽尙阿迅卽馳赴楚境扼要駐紮統領諸軍一切調度俱

由該大臣相機妥籌毋稍遲誤粵西所調湖南防兵征兵暨湖北官兵俱著先行遣回以資策應所需軍餉著戶部寬爲籌備毋誤事機朕思全楚人心素稱強固當茲賊氛肆擾在籍官紳士庶諒必志切同仇咸深義憤著程裔采徧行曉諭如有鄉民團練自固藩籬互相保衛殺賊立功者卽行破格保奏候朕施恩其有被賊逼脅自拔來歸按獲奸細殲斃賊匪者並可寬其既往予以自新見復續調各省精兵馳往協剿蠶茲醜類計可速就殲除該大臣督撫提鎮等其各協力同心以副委任○諭軍機大臣等本日據程裔采馳奏粵匪竄至永州城外官兵堵禦獲勝情形並請欽差大臣前赴湖南以一事權等語前因楚邊緊要飭令賽尙阿迅速移營就近調度見在賊匪竄至零陵縣屬之雙排地方雖經鮑起豹等合力堵擊尙恐由道州一帶肆行竄擾程裔采已回駐長沙

爲防護省城之計著賽尙阿迅卽統帶大兵馳赴湖南扼要駐紮
鎮將中孰應畱粵孰宜赴楚自行酌量調遣其粵西防剿事宜卽
著勞崇光籌辦向榮前爲鄒鳴鶴畱駐省垣據賽尙阿奏已飭劉
長清赴楚剿賊向榮回提督本任此次賽尙阿移營湖南是否仍
須向榮前往可資得力抑或令其專辦廣西軍務均由該大臣酌
度辦理見已派前任湖北巡撫羅繞典馳赴湖南幫辦軍務所有
紳民團練防禦各事宜卽可商同籌辦該撫籍隸湖南情形必當
熟悉也將此由六百里諭知賽尙阿並諭勞崇光知之○諭程喬
采奏粵匪竄至永州官兵擊退獲勝情形一摺該匪既有直達湘
漢之謠更恐衡永一帶所在會匪嘯聚且郴州戕官案內漏網餘
匪亦恐乘機勾結況湖北省城獲有僞示則該匪耳目心腹散置
兩楚正復不少事機稍涉遲鈍必致勢若燎原該督折回長沙居

中調度衡永兩郡雖有提鎮統兵嚴守而水陸閒道旣多處處均須防堵切不可顧此失彼致墮奸計前經兩次降旨令四川豫備精兵二千名又松潘建昌二鎮兵二千名候調如需用孔亟卽著該督迅咨徐澤醇飛調至江西兵二千名想已催調啟程到後著查看情形妥爲布置各路所解廣西軍餉准截畱湖南備用除前經該督請撥帑銀五十萬兩已由戶部速籌迅解外見令該部寬爲儲備該督仍當搏節動用並督飭在事文武員弁協力同心奮勇剿捕趁此賊鋒大挫官軍得手之時一鼓作氣蕩除羣醜尤須嚴密偵探訪獲奸細並激勵地方紳民互相保衛該逆聲東擊西是其慣技所稱欲撲長沙或卽是令我應接不暇爲窺伺衡永之計必須兼顧周到毋令乘我之隙仍當示以鎮靜以安民心將此由六百里諭知程裔采並諭龔裕駱秉章知之○諭本日據程裔

采馳奏逆匪竄至永州旋經擊退復有欲擾長沙等語已明降諭旨令賽尙阿馳往湖南督剿矣前疊經降旨令徐廣縉選帶精兵馳赴廣西會籌剿賊刻下既已督兵前進逆匪雖竄湖南而粵西境內餘黨尙多該督到粵西後卽會同勞崇光迅速剿捕以淨根株勿畱餘孽此時賊股奔竄楚境情形甚爲喫重前經降旨令該督等選派勁兵取道南韶郴桂之間繞出賊前迎頭截擊著卽相機妥辦毋誤事機葉名琛早經出省其羅境逆匪圍攻日久急宜剪除諒該督撫等協力同心必不至顧此失彼也將此由六百里各諭令知之○己未諭內閣常大瀄奏鄞縣因糧滋鬧首犯到案見在設法督拏梟徒一摺浙江鄞縣西南東南兩鄉匪徒前因圖減糧價聚眾入城滋鬧曾降旨令該撫督飭所屬分別查辦毋令挖累無辜茲據奏稱臬司孫毓汶等督同地方委員會同紳士葉

炯分赴各鄉周歷曉諭該鄉民卽將首犯周祥千送出交官其被梟徒煽惑之眾亦已解散各鄉錢糧均已赴縣投納民情安帖著卽將該犯周祥千嚴行審究起釁根由是否地方官辦理不善因而激變務得確情按律懲辦其奉化縣埠頭莊鬧糧匪徒僅獲從犯王三租一名著卽研訊該處首要各犯藏匿處所嚴飭該府縣督率紳耆迅速跟拏務獲懲治以儆刁頑至鄞縣石山街梟徒尙在聚眾負固新任提督葉紹春見已到任著該撫會同商酌詳查該處進兵道路親往督率相機剿辦仍先督同紳士等妥爲曉諭毋令良民受其要結並團練鄉勇作爲嚮導務將藐法兇徒悉數弋獲按律懲治以伸國法而安善良○庚申諭內閣龔裕奏不諳軍旅見復患病懇請開缺一摺該撫身膺疆寄當此軍務防堵喫緊之際應如何殫竭血誠以圖報效乃因粵匪奔竄漸入楚境輒

以肝氣舊病藉詞引退實爲孤恩大負委任著交部嚴加議處新任巡撫常大滄未到任以前所有一切防堵事宜仍責成龔裕戴罪籌辦儻有疏虞朕惟執法嚴懲不能寬貸○程喬采駱秉章奏探聞匪竄道州於四月二十五日攻破州城和春先已帶兵分投迎截計可趕到等情查該匪自桂林夜遁後甫經浹旬卽攻陷興全迨至擄掠一空復行他竄其猖獗情形本未十分窮蹙嗣雖經永州擊退一挫其鋒人數尙屬不少但道州距永一百八十里之遙究係何日被圍如何攻破是否由永竄往抑係另股匪徒均未據該道府等稟及且提臣余萬清自粵馳回駐紮道州防守係其專責昨准提臣鮑起豹咨稱四日未通文報臣等於四月三十日接余萬清二十四日來咨據稱逆匪猖獗下游喫重應卽帶兵趕赴衡州兼護長沙省會並添調宜章臨武桂陽各營官兵爲迎頭

截剿之計賊與道州逼近何以遠慮下游已屬不知緩急且宜臨
各縣向多土匪並緊接粵東存兵無多何得擅調當卽飛咨阻止
屬其仍在道州設法嚴防詎該提臣發咨之次日道州卽已失守
彼時有無賊匪咨內亦未提及竟不知該提臣見在何處此中顯
有趨避該提臣係賽尙阿派令同楚防堵之員何以荒唐至此查
道州與永明甯遠新田等縣處處相通雖經和春帶兵分投攔阻
但由甯遠而至常甯則與衡州切近若由水路直下又可回竄永
州均屬萬分喫緊臣程喬采未敢稍事遲誤拜摺後卽行由陸起
程星夜折回衡郡嚴密督防至道州被圍失守及余萬清究往何
處並失防文武各員情形俟查明分別辦理又奏昨臣等因省垣
緊要已調鎮筸靖永綏乾州各標兵四百名道標練勇一百名
苗兵一千名以資守禦今蒙 聖諭飭將四川選備兵二千名酌

量調用值茲逆氛肆竄自應趕緊徵調臣等已遵照飛咨但有兵無將仍恐調度乖方見在楚省除提臣鮑起豹駐紮永城外餘僅永州鎮總兵孫應照一員膽力又不足恃此外將備斷難總統重任仰懇飭令賽尙阿選派有勇有謀鎮將數員星速來南以資統勦一面另派精兵數千名倍道赴衡俟該匪竄及卽行迎勦爲前後來攻之計上諭軍機大臣等程喬采等奏道州失守該督折回衡州堵禦並咨調四川官兵各一摺覽奏殊深憤懣該督前奏賊由永州竄至雙排係通道州大路余萬清在彼駐紮兵力尙單和春帶兵萬餘跟追趕至議分兩路一由甯遠馳赴道州堵截是道州已有和春帶到之兵何至遽爾失守余萬清係在道州防堵之員何以率稱下游喫重徑赴衡州且該提督發咨次日州城已陷豈賊眾麇至先期一無聞見該州城防守有無準備文武各官

有無恒怯畏避情事見在下游如何該督先已折回省城茲又前赴衡州省垣重地是否布置妥協衡永兩郡見俱喫重如何分派大員帶兵堵禦孫應照是否可資得力其和春分派由雙排尾追之兵是否足資策應和春見在何處攻勦所調四川江西官兵仍恐緩不濟急賽尙阿接奉前旨想已調回湖南征兵防兵並湖北官兵著該督卽與該大臣妥籌分撥嚴密布置見在賊夥是否盤踞道州抑係流而不守分股搶掠均應處處設防不可顧此失彼其由甯遠常甯至衡永之路尤須豫備迎頭截擊不可更有疏虞並著將道州如何被圍失守情形詳細奏聞本日又據龔裕奏荊州接壤湖南水陸營兵僅七百餘名見已咨商將軍台湧酌派滿洲綠營等兵分防要隘應如何緝匪安民鎮定不擾該督仍當妥籌兼顧其湖南與兩粵交界處所尤須嚴飭地方州縣實力防堵

並剴切曉諭紳民團練保衛自顧身家斷不可爲訛言搖惑紛紛
遷徙儻有殺賊立功或堵禦勦賊者卽隨時查明保奏以昭激勸
賊匪剽悍利在急趨雖頗猖獗亦有冒險孤注之勢若能疊挫其
鋒官民同心合力轉移之機亦在反掌該督務須通盤籌度出以
鎮靜以固人心將此由六百里諭知程喬采並諭駱秉章龔裕知
之○諭見在衡永一帶防剿十分緊急賽尙阿接奉前降諭旨諒
已帶領得力鎮將統帥大兵前往扼要駐紮迅籌勦捕向榮曾任
湖南提督一切情形尙稱熟習見在病勢如何應否調任湖南協
同勦辦卽著賽尙阿酌量飭知總期兼權熟計毋誤事機至廣西
賊匪大股雖竄入楚境地方餘匪不少且與湖南毗連處所均須
嚴防截擊徐廣縉此時是否能抵粵西勞崇光身膺疆寄務當通
盤籌畫緝匪安民以副委任將此由六百里諭知賽尙阿並諭勞

崇光知之○調常大瀄爲湖北巡撫黃宗漢爲浙江巡撫未到任
前以布政使椿壽署理以吳振械爲雲南巡撫

由四川布政使遷

○以湖

南道州被陷總督程喬采巡撫駱秉章下部議處○辛酉吳文鎔

張亮基奏滇黔邊界多與粵鄰防堵不容刻懈因時差人赴粵西

大營一帶偵探賊情

臣

等細加訪察似係提督向榮誇詐冒功飾

智欺人以致軍心不能帖服奮興卽如賊之由新墟竄入永安也

向榮與巴清德營盤被劫所有軍火礮械隨營糧餉兵士衣裝全

行遺失向榮首先遁入平南託言保守縣城其失機敗衄之罪已

無可追蒙

皇上不殺之恩許其帶罪立功乃向榮復託病偃蹇

月餘不出坐視永安百姓之塗炭漠然不以介意經賚尙阿再四

強之始赴軍營視事又令其總統北路全軍乃向榮徒爲大言一

無實際屢屢自表軍令嚴明將士用命並未聞破一賊營擒一賊

目而我軍殞將折兵不一而足伊所稟報勝仗非曰轟斃賊匪多名卽曰奪獲賊械多件止虛擬而絕無實數也且賊棄永安數日向榮始統兵前追又不審機宜猝遇賊伏致大兵潰散傷亡鎮將四員聞向榮止帶殘兵數十名一晝夜奔馳二百餘里躲入省城自保反捏稱統帶大兵間道赴援似此有虛名而無實用之人諒未足倚以辦賊臣等聞軍營在事諸人文員中惟勞崇光武員中惟副都統烏蘭泰二人有膽略有血性儻重其事權俾與賽尙阿相助爲理或可漸收實效上諭軍機大臣等向榮經朕屢次棄瑕錄用宜如何感激朕恩力圖報效若如摺內所指各情種種孤恩溺職實屬大負委任著賽尙阿秉公確覈據實參奏徐廣縉抵廣西後畱心查訪如果屬實亦卽行參奏毋稍含混原奏片著鈔給閱看將此各諭令知之○諭據吳文鎔等請飭廣西仿照嘉慶

年間舉行築堡事宜並鈔錄明亮等原奏呈覽上年粵匪滋事疊經有人條奏堅壁清野之議飭令實力舉行見在賊竄楚境已降旨飭令該督撫等勸諭紳民團練自相保衛著程喬采會同龔裕駱秉章查照所奏各就地方體察情形飭屬認真試辦總須隨地制宜方爲妥善常大溱張亮基到任後並著接續辦理原奏片著鈔給閱看將此諭令知之○壬戌 御試翰林詹事等官擢李聯琇等五員一等餘升黜畱任有差○諭內閣倭仁奏敬陳治本一摺意在責難陳善其言尙無不合惟朕特授倭仁爲葉爾羌幫辦大臣原使其敷歷邊疆俾資練習今觀所奏仍係統論治道並未及邊陲切要情形豈忽近圖遠轉以職守爲無關輕重邪嗣後總宜畱心邊務實力講求於任內應辦事件毋稍疏忽如有地方要務切實敷陳朕亦可驗其學識毋得徒託空言致負委任○予廣

西死事副將阿爾精阿入祀京師及廣西昭忠祠○癸亥諭內閣
前因倉場侍郎覆奏興平倉海運米石短少各情當交戶部詳覈
速議具奏茲據該部奏稱查海運成案漕糧抵津由驗米大臣會
同倉場坐糧廳直隸江蘇各委員眼同查驗由坐糧廳取具該經
紀切結督收運通抵通後由裏河轉運大通橋如查有短少潮溼
等弊均惟經紀是問見在興平倉米石如果在津時卽有弊混該
經紀何肯出具切結迨至抵通驗收該坐糧廳何以率行轉運且
既經查倉給事中參奏該侍郎又將斛面短少查驗得實何不將
舞弊之人嚴參治罪照數追賠輒據經紀等一面之詞歸咎於天
津驗米大臣著朱嶠據實明白回奏當此整頓倉務之際若不嚴
加懲創更恐肆無忌憚卽著該侍郎等嚴飭坐糧廳驗收米石如
查有潮溼虧短等弊卽將舞弊之人送部治罪照例追賠至由石

壩運大通橋後分運各倉務各釐剔弊端實力訪察如經營各官
意存回護亦著據實參奏毋稍徇隱○諭前據徐廣縉葉名琛奏
勦辦廉州股匪連破那瀉分界兩處賊巢惟首匪李士青逃入那
練茲據奏稱移營屯馬後高廉道沈棟輝等帶領兵勇分路進攻
放火焚燒延毀賊巢斃賊不計其數惟首匪李士青逃往大直參
將劉開泰等奮勇跟追沈棟輝會督遊擊蘇崇阿等拔營前進廣
西遊擊雙貴等分路兜捕該首匪奔至大直經巡檢王維清督練
截回劉開泰玉山頭隊趕到槍斃著名賊目劉亞潰殺賊百餘名
賊逃入木脈隘旋竄唐雞隘我兵追至山內李士青率夥黨竄往
那屯隘口該處團壯黃載熙誘入柵門我兵一到即將首逆李士
青並李士芳李士奇方吒農及首逆之父李展成偽軍師邱天保
周小吉七名及跟隨兇匪一併擒獲廉州境內匪徒殲除殆盡地

方一律肅清該督撫調度有方所有在事文武員弁自上年三月內剿辦陸屋匪徒大獲勝仗之後如那芹新鋪那瀉分界各處無不埽穴擒渠實屬始終奮勉著徐廣縉葉名琛擇其尤爲出力者酌量保奏該督見飭沈棣輝督帶得力員弁迅赴高州著將羅境逆匪迅速埽除以慰廑念○命吏部左侍郎邵燦戶部右侍郎麟魁在軍機大臣上行走○甲子諭內閣近來各直省問刑衙門多溺於救生不救死之說遇有關係倫紀重案往往裝點情節避重就輕殊非明刑弼教之道朕於刑部等衙門題本其有情節可疑者屢經飭令覆訊原以法貴持平不可枉亦不可縱卽如湖北喻李氏同謀致死本夫一案該撫原題並未究出實情經刑部駁令覆審該撫仍照原擬具題非朕指出疑竇特旨交審幾致淫兇漏網死者含冤湖北如此他省可知嗣後各直省督撫於一切刑名

事件務各嚴究確情毋稍遷就其由該部駁審之案無論失出入一經訊得實情卽當據實平反毋得固執原題含混了結如委審之員有瞻徇回護情弊卽著從嚴參辦以副朕明慎用刑之至意將此通諭知之○諭自廣西辦理軍務以來失事獲咎人員間有該省原奏聲明畱營效力者朕念軍營用人難拘常格姑准畱營以資差遣獲咎各員果能知感知懼力圖報稱原不必以一責概從擯棄若竟不知愧奮遇事退縮軍營中亦安賴此劣員爲邪著欽差大臣暨各督撫等認真查覈不得濫請畱營以爲開復地步並將從前畱營各員詳加查看分別奏請畱撤其失守城池各員尤當嚴查照例參奏治罪斷不准任聽稟報飾詞稍存姑息至臨事告病尤屬心存規避見在楚粵兩省防剿喫緊之際該地方文武有告病開缺者著照從前海疆告病之例交吏兵兩部隨時

存記俟該員病痊引見時聲明請旨○諭吏部等部奏遵議辦理
番案各員處分一摺此案曾經訊取認搶草供之題升甘肅平羅
營參將陝西黃甫營遊擊珠克登題升甘肅北川營都司固原提
標左營守備石長興西甯府知府鈐祥均著降三級畱任該員等
係屬失入著不准抵銷辦理草率之前署陝甘總督薩迎阿著降
四級畱任准其抵銷隨同審案漏未取供之刑部郎中梁熙員外
郎覺羅奎棟武汝清均著降二級畱任准其抵銷薩迎阿之子戶
部員外郎書紳並無承審之責輒同司員問供實屬不知檢束著
降三級調用不准抵銷○諭軍機大臣等龔裕奏籌辦防堵事宜
請酌撥官兵軍餉一摺粵西逆匪竄入楚境湖北與湖南接壤必
應豫籌防堵據奏已調宜施各營兵一千名派員管帶交將軍台
湧分段嚴防並咨明程裔采等迅派官兵堵截卽著嚴飭兩省帶

兵文武於水陸各要隘認真堵截毋任賊匪攔入尤須查看地勢扼要設防嚴密偵探但不得過事張皇轉致人心搖惑前已有旨令提督博勒恭武暫緩來京陛見所有湖北防堵事宜著與將軍台湧會同地方官妥爲布置粵西軍餉准其酌量截留以濟急需仍俟部撥餉款到日卽行照數解還見當防堵喫緊之時龔裕雖經革職豈能置身事外若不激發天良意存諉卸設有疏虞朕必重治其罪程裔采身任兼圻更屬責無旁貸務當通籌全局不可顧此失彼致誤事機將此由五百里諭知程裔采龔裕並諭台湧博勒恭武知之○奪龔裕職仍令戴罪籌辦防堵事宜○調陝西兵二千名河南兵一千名赴湖北防堵○丙寅諭內閣朱嶠奏遵旨查明海運米石起卸情形一摺此次海運米石由天津剝運抵通較之豫東漕糧起卸尤宜迅速據該侍郎查明坐糧廳等尙無

有意積壓情事惟當大雨時行之際若每日起卸不足三萬石之數必致輪轉不及且易啟偷漏需索等弊著朱嶠嚴飭廳員迅速催卸不得藉詞推諉有誤正供儻經紀人等故意刁難卽著嚴拏懲辦其石壩轉運並著督飭趕辦如有遲延一併參奏○丁卯諭內閣前已有旨令賽尙阿迅赴湖南籌辦軍務其未到以前著程霽采督辦防剿所有軍營提鎮以下帶兵大員統歸節制該督其通盤籌畫相機調度以副委任○賽尙阿奏賊於二十一日至距永州府三十里之水西橋由和春飛咨湖南提督鮑起豹永州鎮總兵孫應照嚴密防剿二十三日行抵黃田鋪探得賊至永州城外河西屯紮二十四日復由東南竄往道州一路和春馳抵永州賊已竄走又值大雨暫紮城外河岸山梁卽日拔營跟蹤追剿臣因賊蹤未定情形日有變遷一經移動恐於控制調撥轉不相宜

止可暫駐省城督辦查送匪自省城北竄時氛燄已覺稍戢及至興全又肆鴟張賴和春等兵到痛加勦擊斬馘甚多該逆懼爲大軍圍逼退出州城擄船二百餘隻復欲順流駛竄臣聞信深切焦慮屢次飛移程喬采嚴密豫籌卽據該督函稱楚粵界連各要道俱已加意嚴防惟以兵分見單屬將余萬清所帶楚兵仍令帶回時以此項楚兵已由和春帶赴楚境追勦與余萬清帶領回楚無異目前賊雖竄近道州幸其匪黨在全州被官軍勦創斃其大頭目蕭潮潰該匪與楊秀青同爲洪秀泉左輔右弼謹將供詞鈔錄恭呈御覽其馮雲山羅亞旺受傷險重勢亦必死惟賊中邪術能用水法取子治傷奇效或馮雲山等藉此苟延賊中自逆首洪秀泉以下猶有渠魁楊秀青韋政等數人或亦各生疑懼且賊在全州大挫旣爲河路釘椿不能遂其順流而下之志察其焚棄舟

船輜重婦女銀兩逃走情形似實較前窮蹙湖南永州防禦謹嚴賊至該郡又不能攻追兵甫近賊卽蒼黃奔竄臣密授和春機宜令於奮迅之中倍加精細乘賊喘息未定出奇制勝或可一鼓成功劉長清所帶粵西本省官兵先經臣飭令帶領踰境追剿見據勞崇光稟明大兵赴楚足敷剿辦恐賊乘虛回竄或有措手不及之處令該鎮仍將此項粵兵一千一百名帶回省城俾臣隨時調遣並令續由省城派往楚兵八百名卽由副將鄧紹良管帶隨後探賊跟追 上諭軍機大臣等前因粵匪竄擾楚境曾經降旨令賽尙阿迅赴湖南統領諸軍調度一切茲據奏稱賊蹤未定一經移動恐於控制調撥轉不相宜並將劉長清調回粵西省城以防賊匪回竄等語見在葉名琛接辦凌十八股匪徐廣縉計日可到廣西刻下衡永一帶防剿十分緊急賽尙阿著俟徐廣縉到後仍

遵前旨迅卽馳赴湖南扼要駐紮與程裔采合力剿賊毋稍遲延
劉長清打仗素稱得力如賊匪不至回竄該大臣卽酌量帶往楚
南軍營以資調遣勞崇光見在邊界各處嚴密巡防楚粵兩省情
形皆所熟悉著卽通盤籌畫隨時知會程裔采併力夾攻或派勁
兵越境追剿毋誤事機方爲妥善此時賽尙阿暫駐廣西所派帶
兵赴楚大員見已明降諭旨統令程裔采節制以期事權歸一至
賊首蕭潮潰是否實係殲斃馮雲山羅亞旺是否受傷仍著偵查
確實具奏將此由六百里諭知賽尙阿並諭勞崇光知之○諭徐
廣綰奏卽日馳赴梧州及圍攻羅境情形前因廣西軍務喫緊疊
經降旨令該督酌量情形赴粵督剿復於四月初六日明降諭旨
派令馳赴廣西會同賽尙阿辦理軍務該督接奉此旨定已啟程
前進見在逆匪竄至湖南道州失守已諭令賽尙阿前赴湖南剿

辦廣西巡撫勞崇光出省防堵省垣重地總理乏人著徐廣縉迅
卽前赴廣西沿途派委將弁將波山股匪埽除所有該省應勦餘
匪及安撫各事宜均歸徐廣縉督辦賽尙阿卽遵前旨馳赴湖南
毋稍遲延至逆匪竄入湖南經楚粵夾攻難保不窮蹙奔回兩粵
交界地方尤宜認真防禦不可稍存大意該督統轄兩省事權歸
一諒必通盤籌度計出萬全羅境淩逆勢已窮蹙葉名琛到後不
難剋日殲除該督正可專辦廣西軍務也將此由六百里各諭令
知之○諭賊匪破陷道州不卽屯踞勢必向他處竄擾程喬采見
已還駐衡州居中調度該督統轄兩省責無旁貸所有和春等統
帶追勦之兵勇合共一萬五千餘名著卽相機調遣督飭進勦毋
令紛竄蔓延廣西兵餉已准其酌量截畱見當賊蹤靡定防堵喫
緊之際轉輸糧餉最爲行軍要務必須派委妥員辦理源源接濟

毋得遲誤至衡州爲全楚門戶該督見在扼要駐守總當隨時偵探設法堵剿防其陸路翻山水路順流肆擾他處是爲至要將此由六百里諭令知之○予廣西死事知州林光謙等祭葬世職○戊辰諭內閣僧格林沁等奏火器等營前赴廣西營員陸續回京等語火器營委翼長祥麟等經賽尙阿等帶往廣西輒以不服水土先行回京本有應得之咎姑念前在軍營打仗著有微勞著免其治罪仍回各處當差○壬申 上御勤政殿聽政自是以爲常○諭軍機大臣等台湧奏馳往荊州等處擇要設防一摺粵西逆匪竄擾湖南邊界前據程裔采奏報道州失守之後尙未據續報賊匪情形湖北與湖南連境前已諭令龔裕隨時與台湧會商妥爲布置茲據該將軍奏稱卽日馳往荊州所屬石首監利兩縣將所帶滿營官兵一千六十餘員名擇要設防所有該處各緊要隘

口卽責成該將軍嚴密防守毋得稍有疏虞所稱派兵作爲水探
豫防江陵公安交界處所並酌量抽調滿漢官兵等情均著照所
議辦理仍隨時知照督撫提鎮一體妥籌勿致顧此失彼並剴諭
居民斷勿驚惶遷徙於撫綏彈壓之中尤當示以鎮靜將此由五
百里諭令知之○以文慶許乃普俱爲內閣學士

文慶已革尙書
許乃普由光祿

寺卿

○癸酉程喬采奏據署道州知州王揆一稟四月二十三

等日探聞賊至雙排面懇余萬清妥爲布置二十五日辰刻賊竄
莊水塘離城四十餘里余萬清卽以帶兵堵剿爲詞意欲遁去經
該署州催促上城隨同余萬清巡查四門賊由西北一帶而來城
西北角本係遊擊瞿我謙派兵防守其時止有甫經調到之千總
唐得升在彼該署州卽屬乘勢攻撲一面飛請余萬清督禦詎至
西門余萬清業已出城並將防兵帶去適有數賊踵至該署州丁

役向前被賊打傷左手腕當卽跳城而出欲將余萬清挽回賊旋
入城該署州愧憤投河經地方紳民撈救又欲自刎亦被將刀奪
棄同聲願起義勇爲官收復城池等情臣正查辦聞該提臣隨來
衡州堅求一見臣當面加斥責該提臣亦自認糊塗惟總以欲往
蛇皮渡堵截爲詞查余萬清旣駐道州防堵係其專責兵力雖單
亦應固守城池況大兵業已跟追猶可爲內外夾攻之計該提臣
輒卽帶兵而出已失機宜而前准來咨稱欲趕來衡郡防護長沙
臣已斥其舍近求遠今復稱往蛇皮渡堵截並無來衡之語尤屬
前後兩歧實不免有棄城而逃捏詞支飾情事王揆一職膺守土
未能先事豫防迨賊至撲城又以出城挽留提臣致州城竟爲匪
踞遊擊瞿我謙亦係駐守州城之員今亦不知去向均出情理之
外自應分別嚴究以肅軍政請旨將提臣余萬清暨永州鎮右營

遊擊瞿我謙革職拏問署道州知州王揆一先行革職交寶尙阿嚴審辦理再余萬清在江華防堵已將兩年先聞其情形熟悉辦事精細前經臣與駱秉章密保今如此懼怯無能是臣與駱秉章均屬保奏不實應請交部分別議處上諭內閣程喬采奏參棄城失守文武各員並查明道州被陷情形前任湖南提督余萬清經程喬采派令帶兵防守道州乃於逆匪竄入境內輒先棄城而逃又復捏詞支飾遊擊瞿我謙亦係駐守州城之員何以不知去向余萬清瞿我謙均著革職拏問仍於查拏瞿我謙到案時嚴訊逃避情形據實具奏道州知州王揆一有守土之責據奏受傷踰城投河遇救各情節殊屬支離著一併革職拏問另片奏請將該員畱營效力著不准行見在寶尙阿尙未到楚此案卽交程喬采秉公嚴審確情按律定擬具奏余萬清係程喬采駱秉章奏請畱

楚之員該督等保舉不實著交部分別議處○程喬采奏賊踞道州於水南門紮營一座爲逆首屯住之所又於斧子嶺洪家村何家村柑溪鋪百嶺頭各要隘均紮賊營業經賽尙阿派委總兵和春藩司勞崇光會督總兵常祿秦定三李瑞經文岱王錦繡副將鄧紹良參將德亮復委江忠源張國樑帶領湖北湖南雲南貴州廣東各官兵暨楚勇捷勇通共一萬五千餘名先後來楚並經提臣鮑起豹派令遊擊傅振邦帶兵六百名赴道會剿旋據和春稟報五月初五日晚趕將浮橋搭齊派令官兵分爲中後左右四路齊進並令後路之四川兵在於何家村山後埋伏以爲後應初六日寅刻同抵五里亭逼近賊巢楚捷各勇施放槍礮誘賊出敵約半時許該匪分三路撲來每路約二千餘人勢極兇猛總兵常祿等分帶兵勇攔頭迎剿我兵槍礮齊施斃賊多名該匪開礮回攻

我兵奮力向前鏖戰數時該匪先猶死力抗拒繼則紛紛倒地仍敢以槍礮回擊我兵奮勇齊追突於嶺右衝出伏賊二三百人攔腰接仗又經後路官兵趕上極力擊退該匪紛繞嶺後敗走查粵匪雖踞道州而竄入楚境後已兩摧其兇燄惟亟須設法速殲方不至復形猖獗藩司勞崇光見駐永州臣自當妥與籌商剋期進剿上諭逆賊竄踞道州負隅抗拒見在鄰境土匪疊經痛剿賊勢已成孤立勞崇光已移紮永州策應較近和春等又帶到兵勇一萬五千餘名足資會剿著程裔采督飭文武員弁激勵紳民與勞崇光合力圍攻務期一鼓蕩平以靖妖氛而綏疆圉○諭軍機大臣等程裔采奏粵匪竄踞州城並甯遠東安兩縣土匪竊發見在剿辦情形一摺粵匪竄越楚界盤踞孤城我軍兵勇共有一萬五千餘名和春向稱奮勇勞崇光前在廣西辦理南太一帶匪徒

調度尙合機宜提督鮑起豹見亦督兵會剿務當乘賊營未定之際併力進攻兵貴神速斷不可稍涉遷延且聞道州紳民激於義憤團練剿賊正可設計約會作爲內應聚而殲旃萬勿失此事機致貽後悔道州處楚粵之交賊匪北竄可撲永州南竄卽回粵境勞崇光係廣西巡撫越境剿賊尤當兼顧粵疆以防逆匪回竄之路至地方土匪乘閒竊發既有冒稱會匪情事卽難保不暗相勾引見在甯遠東安兩縣匪徒務卽迅行撲滅毋致蔓延其餘附近州縣亦當嚴飭地方文武先事豫防節次諭令程喬采飭屬舉行團練諒已辦有端倪賽尙阿到楚尙須時日所有見在防剿事宜卽責成程喬采勞崇光會商妥辦該督等其同心勦力迅掃賊氛以慰廑念湖南湖北兩省輿地驛路形勢著詳細繪圖貼說呈覽將此由六百里諭令知之○甲戌諭內閣前因朱嶠回奏海運米

石短少情形與戶部原奏兩歧特派恩華彭蘊章前往查辦茲據奏稱查驗坐糧廳公文清冊此項米石在天津不過蒸熟到通州始見潮溼通州坐糧廳仍加風晾始行驗收與該侍郎原奏據經紀供稱河干未能挑晾以致轉運後米身收縮之語不符其經紀在天津出結係屬向例該侍郎不得諉爲不知等語此次海運原爲倉儲緊要權宜辦理若任聽經紀藉端挑斥必致遲延貽誤該倉場侍郎自應通盤籌畫以濟倉儲乃於倉米短少並不虛心引咎輒以天津收驗爲詞嘵嘵置辯殊屬不合朱嶠著交部議處其未收米石仍著責成坐糧廳及大通橋監督認真查驗迅速轉運如有潮溼短少情弊著卽嚴究懲辦○乙亥諭內閣前已有旨將前任湖南提督余萬清等革職拏問交程喬采嚴行審訊茲據賽尙阿奏請將該員查辦一摺余萬清以提督大員帶兵分守道州

不知設法防剿乃於賊匪竄偏州城輒先出引避並將西門防兵帶出以致州城失陷似此喪心昧良開門揖盜實出情理之外著程喬采遵照前旨將已革署知州王揆一原稟情形逐一嚴查確訊並提余萬清與王揆一當面對質如果實係棄城逃避著卽按律定擬請旨正法其王揆一踰城投河各情節與已革遊擊瞿我謙有無下落仍著迅卽查訊定擬具奏嗣後統兵大員有臨陣脫逃或託病遷延致誤軍機者著該大臣督撫等一經查明確實卽行據實參奏請旨正法其參遊以下各員如有逃避畏葸以致失地喪師者著一面具奏一面卽於軍前正法以肅軍律不得巧爲開脫致啟徇縱之漸○諭軍機大臣等據賽尙阿奏逆匪竄踞道州經我軍圍剿並兼籌各路堵禦一摺前因粵匪竄楚疊經降旨令賽尙阿馳赴湖南調度一切茲據奏稱道州東西南面俱與粵

省接壤道路紛歧處處交通該逆如勢難北竄必復折回粵境勢不能不暫畱桂林省城見在勞崇光已赴永州防剿一時未能旋省該大臣自應暫畱駐守以防賊眾回竄俟徐廣縉督兵到省賽尙阿卽仍遵前旨迅赴楚南扼要調度毋稍遲延另摺稱四川安徽解餉官員前在全州同時殉難所解餉銀若干是否被賊搶掠並著查明具奏仍隨時知照勞崇光於楚粵交界處所通籌兼顧毋得稍有疏虞將此由六百里諭令知之○諭陸建瀛片奏截畱浙漕濟賑咨商常大漕將本色米石查照時價易銀分別解至江浙並稱江南辦賑每有刁生劣監希圖染指煽惑愚民滋鬧等語著杜受田怡良於所奏各情悉心體察米石應否折價其放賑時應如何確切稽察使刁劣不致藉端生事仍責成地方官妥籌辦理原摺片著鈔給閱看將此諭令知之○丙子晉封 貞嬪鈕祜

祿氏爲 貞貴妃○子廣西死事知州曹燮培等四川殉節知州
盧金第等祭葬世職○丁丑諭內閣戶部奏旗民交產擬請量爲
變通一摺另片奏奉天旗地仍照舊例辦理等語向來旗民交產
例禁綦嚴無如日久弊生或指地借錢或支使長租顯避交易之
名陰行典賣之實此項地畝從前免納租稅原係體恤旗人生計
今既私相授受適啟胥役人等訛詐句串等弊爭訟繁多未始不
由於此若仍照舊例禁止殊屬有名無實著照該部所請除奉天
一省旗租盜典盜賣仍照舊例嚴行查禁外嗣後坐落順天直隸
等處旗地無論老園自置亦無論京旗屯居及何項民人俱准互
相買賣照例稅契升科其從前已賣之田業主售主均免治罪一
切應辦事宜仍著該部妥議章程具奏○已卯諭內閣舒興阿奏
番賊竄擾搶劫見在嚴加防堵等語本年三月間番賊竄至永安

城附近地方搶掠牲畜等物經永安遊擊吳仕珍帶領弁兵追捕據報殲斃賊匪二名未曾割取首級賊已遠遁無蹤難保非藉詞掩飾吳士珍著交部議處署經制外委馬生福擊賊受傷殞命著該部照例議卹番賊肆行搶劫出沒無常全在汛卡員弁嚴密防守認真巡緝方可杜患於未萌見在西甯雖擊獲番賊才浪先木等訊辦而沙巴爾台等處番賊搶案疊出實爲地方之害著舒興阿督同提鎮嚴飭弁兵隨時偵探遇有番賊近卡窺伺迅卽捕拏勿令遠颺並著西甯辦事大臣一體嚴密巡防以期綏靖邊圉毋稍疏懈○諭軍機大臣等御史梁紹獻奏請查沿海各關走私積弊一摺國家設關徵稅權衡貨力制有常經全在各該將軍督撫及各關監督等嚴察弊端庶期稅務日有起色若如該御史所奏廣東江蘇各海口均有內地奸民串通夷商走漏貨稅近年疊經

查出走漏茶葉之案均有在官人役及巡船頭人扶同舞弊至洋
淺細段糖食等貨近來報稅尤少似此藐法走私暗虧國課於稅
務大有關礙著各該將軍督撫及各關監督等按照摺內所指各
情認真查辦事關交涉外夷辦理之法先在嚴查內地商民杜絕
弊端俾夷商無可藉口斷不可稍涉張皇別生枝節原摺著鈔給
閱看將此諭令該將軍督撫並傳諭粵海關監督知之

六月癸未諭內閣陸建瀛等奏遵籌海運事宜一摺據稱見在東
省水勢驟長入牖已無岸可循重運恐難逆輓請分別變價海運
並酌量起卸辦賑截漕抵給兵餉及行月兵匠等米各款著戶部
速議具奏其業經渡黃各幫船仍著嚴催前進毋任遲延另片奏
銅鉛船隻亦難上輓須豫籌變通之計請由臺莊陸運至濟甯再
行雇船載運北上等語著戶部一併速議具奏○諭軍機大臣等

季芝昌奏浙江鄞縣奉化縣鄉民因糧滋鬧鄞邑首犯已據縛送奉化亦獲有從犯應完糧賦均照常輸納惟東鄉拒捕梟徒負隅不服經該督派委張從龍前往曉諭解散黨與自無須重兵圍剿該督已將前調官兵撤回歸伍儻該梟徒等於曉諭後仍不知感悟必當加以兵力見在椿壽署理巡撫應如何調度之處仍著季芝昌會同該署撫酌量情形相機妥辦能將首要各犯悉數擒獲自可解散脅從不至釀成大患將此各諭令知之○甲申諭內閣杜受田怡良奏遵查山東賑務先籌辦理情形並將劉源灝酌擬章程十條開單呈覽一摺據稱上年豐北漫口山東濱河州縣被淹成災魚臺最重濟甯次之金鄉嘉祥滕嶧又次之曾經分別重輕三次放賑見在擬俟河運各幫有輓入東境者卽令先行起卸以資散放等語著卽責成該省藩司劉源灝於散賑時妥爲經理

惟伏秋大汛以後水勢大小及收成豐歉勢難豫定著杜受田怡
良咨明山東巡撫飭令該藩司於秋收後確查被災輕重分別奏
明辦理至截漕備賑各幫船昨已降旨諭令陸建瀛等將業經渡
黃船隻嚴催前進惟旗丁人等既知漕糧作爲賑米恐沿途攬水
和土藉滋弊端著楊殿邦督飭該管糧道認真盤查如交卸時有
短少潮溼等弊卽將丁舵人等嚴懲究辦仍責令賠繳以重賑務
另單奏酌定限期豫籌剝運及遴委大員監盤分運並分剝賑米
存卸災區剝運腳價作正開銷豫查戶口分設米廠各事宜俱著
照所議辦理仍責成該藩司隨時體察情形斟酌妥辦○程裔采
奏臣於四月二十八日抵省五月初三日聞道州失守當卽星夜
折回在省僅止六日其團練壯勇盤詰奸細製造器械添鑄礮位
各事宜業經撫臣督同司道趕辦惟省城形勢低矮見在擇要補

苴並商同撫臣酌添官兵於城外扼要之處築壘紮營以壯聲勢
將來江西兵到再行酌撥駐守藉保無虞至永州兵勇漸多足資
捍禦衡州見亦有兵勇二千餘名於城內外布置昨賽尙阿又派
副將瞿騰龍來衡幫同經理兼赴長沙省城查勘情形臣固不敢
一隅株守而以見在喫緊地方而論自應仍駐衡州居中控制至
甯遠最關緊要該處有鄧紹良堵截於前和春跟追於後賊必腹
背受敵即可聚而殲旃江華永明宜章三縣緊接道州爲逆匪西
竄必由之路宜章與粵東之樂昌等縣交界向係匪徒出沒之區
見均募勇派兵各圖守禦又奏臣據和春稟稱匪踞道州見於北
門外築營似無急竄之意該總兵於十九日以五成兵勇出隊在
五里亭築營逆匪突出二三千人分三股撲來勢甚兇猛該總兵
嚴陣以待將及一箭之地我兵槍礮環施斃賊十餘名該匪紛紛

敗走見在衡永兩郡已撥兵千五十名勇七百名又調苗兵千名
前赴甯遠爲迎頭堵擊之用並聞總兵劉長清右江道張敬修所
帶兵勇亦入楚境諒不日均可到齊上諭軍機大臣等程裔采
奏遵覆寄信諭旨一摺並陳道州接仗布置情形等語逆匪占踞
道州已逾月計各路調集兵勇亦不爲少加以本地團練亟宜
乘該匪營巢未定之時設法合力攻圍該州地勢旣屬平坦與粵
西崎嶇情形不同正可扼其要隘前後兜剿該督接制諸軍卽飭
帶兵各員相機妥速剿辦萬勿遷延致令該匪等深溝固壘布置
從容復蹈永安之轍該城內外爲賊匪逼脅之眾原其心迹不過
畏葸苟安豈肯甘心從逆乘此大兵雲集之時當先曉諭居民或
偵探賊蹤或作爲內應及早掃除羣醜得以共安衽席是亦固結
人心解散賊黨之一道也至圍困賊匪總以嚴斷接濟爲要米鹽

之外尤應嚴防火藥透漏私售卽兵勇中大半楚粵之民亦難保無與會匪暗通消息私爲接濟卽如廣東之羅境廣西之永安等賊皆圍困累月若鉛丸火藥真能斷絕逆匪豈能於彈丸之地憑恃兇燄久抗我軍耶此節最爲要著務須認真查察勿受欺蒙勞崇光見在是否與姚瑩許祥光等駐紮永州籌辦軍務永州乃遏賊要路防堵不可稍疏仍須防賊回竄粵境該督與勞崇光統籌全局隨時知照賽尙阿聲勢聯絡使賊匪無可乘之隙庶可一鼓殲滅長沙省垣大吏均非本任一切鎮撫接應事宜該督須時時兼顧仍密飭地方官嚴查奸細綏撫居民是爲至要將此由六百里諭令知之○丙戌賽尙阿奏逆匪見於道州城外加築土城豎立木柵並於進城隘口設卡意欲久踞和春於五月初七日會督各鎮將帶領兵勇扼要築營並添搭浮橋連日更番疊進誘賊出

巢道州四面皆河城中糧食甚少我軍如能嚴密圍守使其不能復竄可期不戰自斃惟和春等僅能扼賊東北兩面其西南路通粵西之全灌及湖南之永明江華見在劉長清等兵勇難期得力而南面水南路通甯遠一帶尤爲緊要副將鄧紹良所帶鎮守兵八百名楚捷各勇亦有千餘如再添兵二千卽於水南駐紮可資堵截其甯遠縣城又須添兵防守見在飛咨湖廣督臣程喬采酌撥兵勇二三千名由甯遠前來幫同鄧紹良等兵分紮甯遠及水南二處似此布置該逆旣不能竄越再嚴斷其接濟然後相機進剿賊自無所逞其伎倆勞崇光已由永州回粵臣於二十五日卽由桂林統帶文武弁兵起程前赴永州就近督剿再軍前兵勇力圖圍攻實已單薄前調四川督標等兵到營未甚得力請改於松潘建昌挑選勁兵二千備調此項川兵如程喬采尙未調來卽令

其指調松潘建昌挑備之兵其前所挑二千名毋庸再調至此次
湖南已調之江西兵二千名湖北省又調陝西兵一千名河南兵
二千名必須陸續派赴軍前就近圍剿方期得力若在湖南北等
處地方遙爲防堵非惟各處紛紛請兵駐守兵力斷難徧給且軍
前合剿兵單不能扼賊四竄各處毗連郡邑尤爲防不勝防又奏
臣前奉諭旨飭令徐廣縉來西會同辦理刻下前路軍情緊切徐
廣縉雖已咨明由高州起程未知何日始到臣不敢稽遲見卽馳
赴永州力籌督剿惟大局所關不得不熟計詳陳徐廣縉馳抵桂
林之日或令在廣西專辦防剿事宜其欽差大臣關防歸臣專管
在湖南辦理軍務抑遵前旨將欽差大臣關防移交徐廣縉令其
馳赴軍前伏祈綸音明降以便遵行總期事權歸一方於軍務國
事有裨若臣與徐廣縉各駐楚粵仍復會同辦理一切轉多牽制

上諭內閣賽尙阿奏馳赴湖南永州督辦軍務一摺見在粵匪竄踞道州湖南軍務最關緊要著賽尙阿卽帶欽差大臣關防扼要駐紮會同程裔采籌辦防剿事宜相機調度見在勞崇光已回廣西徐廣縉亦經馳抵梧州所有廣西軍務卽著徐廣縉會同勞崇光接辦以專委任○諭軍機大臣等據賽尙阿馳奏逆匪見踞道州我軍圍剿情形並通籌全局見已馳赴永州督辦各一摺據稱嚴斷接濟一節最關緊要昨已諭令程裔采認真查察該大臣見已帶兵馳抵永州著卽將目前防剿事宜會商妥辦道州城外各險隘見尙被賊占踞務卽嚴飭鎮將先將各險隘攻破撤其藩籬使該逆株守孤城庶可聚而殲旃另片奏添調兵丁等語四川前調之兵業據徐澤醇奏稱遴派啟程自未便復令折回抽換其松潘建昌二鎮續調官兵並湖南湖北添調新兵卽著賽尙阿程

商采酌量情形隨時飛調或撥赴軍前或酌畱防守一切機宜朕亦不爲遙制至廣西各勇旣稱在途滋事且多不願越境此等無律之軍卽勉強調派何能得力應如何酌畱廣西分撥防守抑或應行遣散之處均著該大臣等咨行徐廣縉勞崇光妥籌辦理程裔采見在駐紮衡州仍當兼顧湖北防堵事宜隨時咨商台灣龔裕博勒恭武等豫籌妥辦不得顧此失彼將此由六百里諭令知之○諭據賽尙阿奏勞崇光已由楚回粵見擬統帶弁兵前赴湖南永州並據徐廣縉奏見抵肇慶卽日馳往梧州各一摺廣西大股逆匪見雖竄越湖南而本境零星土匪尙未淨盡波山艇匪勢尤猖獗徐廣縉見已馳抵粵西所有該省堵剿各事宜卽責成該督會同勞崇光妥辦其湖南軍務已飭令賽尙阿會同程裔采辦理矣見在道州賊匪被剿緊急難保不復竄廣西卽廣西未淨之

匪與廣東毗連湖南處所亦難保不與道州賊匪暗相勾結接濟該督統轄兩省於楚粵交界地方務須嚴密防守以杜賊匪分竄向榮見既稱病其提督事務暫令馬龍代辦究竟該提督病勢如何該督卽察看具奏廣東羅境逆匪見交葉名琛督剿該督仍當隨時咨商調度迅速剿除毋令久稽顯戮廣西招募壯勇聞多滋事已諭令賽尙阿等酌量遣散並著該督等設法彈壓勿令別滋事端將此由六百里諭知徐廣縉勞崇光並諭令葉名琛知之○賽尙阿奏參候補知府謝繼超不肯管帶潮勇違令繳札請革職畱營得旨謝繼超僅予革職不足蔽辜著發往軍臺效力贖罪○兩廣總督徐廣縉奏報遵旨馳往梧州籌辦剿匪情形得旨卿其妥爲調度一切軍務貴嚴不貴寬○丁亥諭內閣朕惟易著咸恒首重人倫之本詩歌雖肅用端風化之原綏萬福以咸宜統六宮

而作則式稽令典爰舉隆儀貞貴妃鈕祜祿氏質秉柔嘉行符律
度自天作合聿徵文定之祥應地無疆斯協順承之吉惟克懋修
夫內治允宜正位乎中宮其立爲皇后以宣壺教所有應行典禮
該部察例具奏○戊子 萬壽節 上御正大光明殿受賀○辛
卯諭內閣戶部奏遵旨速議漕運事宜一摺所有江安江廣各幫
起運米石均著照該部所議分別催趲並截畱備賑抵給銀款其
浙江幫船本年秋閒是否尙能改行海運著陸建瀛悉心酌覈如
果確有把握卽責成該督妥爲辦理應用水腳剝價等銀仍由浙
江巡撫覈實籌備儘因時交秋令行駛維艱該督卽會同浙江巡
撫妥商截卸在附近上海地方存儲於今冬豫籌來歲海運毋得
互相推諉致干重咎此次漕行遲誤總由豐工未能合龍所致陸
建瀛楊以增著交部分別議處另片奏銅鉛起運亟籌變通等語

著山東巡撫體察情形於各運到境卽飭地方官雇備車輛或多
備剝船催令迅速北上其在後各運並著兩江總督設法催出江
境毋任稍有遲延○壬辰諭內閣僧格林沁奏端華於大考翰詹
時爲已革學士保清修補試卷等語著端華明白回奏是日監試
王大臣載垣等何以不行阻止並著據實明白回奏○賽尙阿奏
臣由桂林省城啟行於六月初一日馳抵永州府城疊據和春稟
報道州東北路通永州府城及甯遠縣東南亦通甯遠西通江華
永明及粵西全州灌陽必須四面圍定方能進剿該總兵見紮北
面可以兼顧東面其西南兩面必須增兵進紮臣先經飭令劉長
清帶領粵西兵千餘由粵之富川取道永明以達道州西路和春
復派撥四川官兵千九百餘名川勇千七百餘名統交劉長清帶
領前往道州西路各隘口擇要紮營臣因賊蹤去粵較遠又將雷

守桂林省城之楚兵八百名派守備米興朝帶領由灌陽前赴道州會合計西面兵力已不爲單足當此路堵剿道州南路緊接甯遠隘口甚多如藍山新田常甯衡陽處處可通且衡郡爲省城門戶一經竄越所關甚鉅是甯遠實爲保障衡長第一要隘而由甯遠走新田縣又有閒道徑達永州欲保甯遠必須嚴堵水南鄧紹良兵勇防守該縣實虞單薄未便令其進堵水南和春見以此路空虛未有大兵堵禦恐攻偏太緊該逆從此竄逸臣當卽函商程裔采於衡永等處撥兵二三千名派員由此路前進以成圍剿之勢旋據咨覆調派苗兵千名交鄧紹良管帶又挑衡州防兵六百名派總兵王家琳帶由常甯新田前進臣到永州後卽將畱守永州之湖南兵撥出六百名交鄧紹良管帶連鄧紹良原帶之楚兵八百名楚勇七百名一併由甯遠進紮偏近水南相機堵禦惟聞

賊匪强悍者多在水南盤踞深慮其專由此路衝突我兵力單仍
俟新調江西官兵到時再抽撥一千名前往會合以厚兵力其甯
遠城守緊要臣復委派總兵孫應照畱兵防守俾鄧紹良帶兵前
進臣見抵永州軍務一切可與程喬采就近籌商 上諭賽尙阿
奏馳抵永州督辦軍務一摺逆匪竄踞道州經和春疊次移營進
剿於五里亭地方傷斃賊匪百數十名生擒五名賊眾仍踞城築
牆意圖抗拒見在賽尙阿已於六月初一日馳抵永州府城分派
各路官兵四面進逼和春紮營道州城北與東面聲勢聯絡劉長
清王家琳鄧紹良等各帶重兵分扼西南布置尙屬妥協著卽會
同程喬采督飭統兵各員乘此兵勇雲集之時合力兜剿務將屯
聚逆匪悉數殲除毋任竄逸復滋擾害○癸巳諭內閣本日據端
華載垣等遵旨回奏各一摺殿廷考試功令綦嚴端華經朕特派

監試輒爲已革侍講學士保清修補試卷實屬違例著退出御前大臣交宗人府議處載垣未能阻止著一併交宗人府議處珠勒亨特興額多爾濟那木凱明慶穆克登額德木齊扎布繼善恩醇聯順安興阿托精阿索布多爾扎布均著傳旨申飭○甲午諭內閣舒興阿奏遵旨籌議番務章程一摺並開單呈覽朕詳加披閱所稱分別地界以杜推諉不分畛域以嚴堵擊徵調營汛發給令旗裁撤零卡統歸總隘以及添派馬探增築濠壘各營會哨隨地搜查番族歲賞仍復舊例各條籌畫均屬周妥著卽照所議辦理該督惟當督飭邊卡文武員弁實力奉行勿得日久生懈其各條內尚有未盡事宜著再行詳晰酌覈分別奏咨辦理○丙申程裔采奏查勞崇光業經回粵接任寶尙阿亦於六月初一日駐紮永郡粵匪占踞道州見尙無他竄之意聞於附城要隘豎柵立營臣

咨催和春趕緊進剿據稟道州地勢平坦四面皆河城內米糧亦少如能層層圍住斷其接濟使其不能復竄定可一鼓成功惟軍營兵勇止能顧及東北兩面其西面業有劉長清等兵勇分由富川永明灌陽恭城而來南面尙屬空虛請再於衡永防兵內酌撥會剿等情臣接賽尙阿咨見派副將鄧紹良統帶兵勇三千七百餘名進紮水南並委總兵孫應照帶領兵勇一千二百名鎮守甯遠以爲南路屏蔽江西官兵不日可到見亦飛檄嚴催派撥前往一俟大兵雲集定可四面兜圍至糧餉爲行軍要務見赴道州攻剿之兵勇無論是楚是粵一切鹽糧仍由粵局供支其在楚原防兵勇暨續調官兵則由楚局支應似此各專責成辦理尙爲周妥

臣思逆氛雖竄楚疆一切支銷仍歸粵員承辦前此截畱軍餉北南兩省均因兵勇續增需用愈繁先行借動其餘收儲銀兩仍分

批趕行解往粵西藉資應用計南省已奉撥銀一百五十萬兩北
省亦奉撥銀三十萬兩尤應彼此通融臣當體察情形如該省稍
形支絀亦即將借用之款照數撥還上諭軍機大臣等賊匪占
踞道州於附城要隘豎柵立營雖據稱察看情形尙無他竄之意
而賊情詭譎難保不分遣匪徒潛赴各屬勾結伺隙竄擾若不及
早攻剿恐又蹈永安故轍資尙阿見已馳抵永州扼要調度與該
督聲勢聯絡務當嚴飭帶兵大員及地方文武合力進攻仍飭各
屬密拏奸細確探賊情並激勵紳民接緝匪黨互相保護或約爲
內應乘其不備一鼓殲擒全在該大臣等隨機應變方能出奇制
勝不至墮其奸計道州地勢平坦四面皆河米糧亦少果能於水
陸要隘嚴密接濟賊勢豈能持久火藥一項尤關緊要前已有旨
飭令嚴防透漏私售此等奸徒必當盡法懲辦近來軍營破獲之

案甚屬寥寥可見查拏並不認真也道州南路空虛見已調撥各兵三千七百餘名進紮水南並委總兵孫應照帶領兵勇一千二百名鎮守甯遠兵力亦不爲單弱惟孫應照能否得力堪爲南路屏蔽仍須隨時察看勿致貽誤至糧餉爲行軍要務督辦須專責成據奏廣西臬司姚瑩鹽法道許祥光稟稱已派委接濟糧臺卽照所請見赴道州攻勦之兵勇無論楚是粵一切鹽糧仍由粵局供支其在楚原防兵勇暨續調官兵卽由楚局支應以歸畫一而免涸淆其甯遠東安兩處土匪雖已殲擒蔣璘一犯見尙漏網務須設法偵拏各屬地方仍當隨時查察勿稍大意將此由六百里諭令知之○湖廣總督程裔奏接奉諭旨與幫辦軍務羅繞典商辦築堡事宜得旨羅繞典人尙可用擇緊要處所試行之○戊戌諭內閣本年浙江漕船開行太遲見在甫入江境勢恐貽誤

倪良耀於漕務尙能熟悉著兩江總督江蘇巡撫督同該臬司速
卽設法妥籌辦理毋任遲誤○諭顏以燠奏患病增劇勢難赴工
一摺本年豐北口門未經合龍運河漫水未退南糧北上已形艱
滯見在大汛經臨黃河水長濟運修防諸關緊要該河督受恩深
重正當力圖報效據稱手足麻木係屬積勞舊疾何以不早請開
缺當此喫緊之時輒請將河督印信交河南巡撫兼署顯係畏難
苟安諉過他人實屬取巧顏以燠著卽開缺仍畱東河俟病痊後
以道員降補河東河道總督著慧成補授卽著馳驛前往慧成未
到任以前著陸應穀暫行兼署○調倪良耀爲江蘇按察使查文
經爲甘肅按察使○己亥諭內閣御史肇麟奏請實行積穀以除
弊混一摺上年陸建瀛奏勸捐鄉穀上元江甯二縣各捐穀二三
萬餘石辦理已有成效當降旨令該督轉飭各屬按照章程廣爲

勸導並著各省督撫一體妥辦原以義倉之設最爲便民善政封疆大吏果能飭屬實力奉行圖匱於豐自能有備無患見在江蘇省續捐鄉穀共有若干及各直省如何舉行均未據詳細奏聞著再行申諭各督撫體察地方情形年歲豐歉飭屬勸諭紳民妥爲籌辦據實具奏至該御史風聞外省私將積穀改爲積錢不肖州縣往往任意侵那藉肥私橐種種流弊難保必無著各該督撫嚴行稽察如有前項弊端卽行參奏懲辦總期於民生實有裨益方不負朕諄諄誥誥之至意將此通諭知之○庚子諭內閣舒興阿奏中衛縣城地震派員勘辦一摺甘肅中衛縣城鄉地方於本年四月初八日起至二十三日連次地震經該督派員查明居民房舍震倒二萬餘閒壓斃男女大小三百餘口受傷者四百餘口該縣城垣衙署及倉廩監獄等處均多坍塌傾圮居民糧食衣服牲

畜亦多被壓沒餬口無資深堪憫惻著該督迅委賢員前往妥爲
安撫並將同時被震各堡迅速查勘應動支何項錢糧分別撫卹
及該縣被災處所本年地丁錢糧應行寬免之處一併確覈奏明
交速辦理毋令一夫失所以副朕惠愛黎元之至意○幫辦軍務
前湖北巡撫羅繞典奏行抵楚北探詢湖南軍務並沿途面邀各
官紳給與團練防堵條款諭令齊團以緝內奸練勇以防外寇堅
壁清野以絕剽掠而固藩籬有能殺賊立功者許邀獎敘改匪歸
良者准予自新報聞○戶部議准福建巡撫王懿德疏報侯官福
安二縣開墾田二百畝有奇噶瑪廳田園一千九百九十二甲照
例升科從之○辛丑諭軍機大臣等勞崇光奏通籌防剿情形一
摺據稱道州距桂林平樂兩府屬之恭城富川賀縣灌陽興安全
州等州縣均止一二百里處處有徑路可通省城該撫自應通籌

全局加意防堵所有分布兵勇團練各事宜俱著照議妥辦至柳州慶遠鬱林各屬游匪土匪不時竊發勢難紛紛派兵防剿卽著密飭各該管道府州隨時偵緝仍令實力團練以資捍衛不可稍懈其南太一帶善後事宜並著陸續妥爲籌辦波山艇匪經徐廣綰親督兩省文武合力搜捕定可卽日悉數殲擒該督於竣事後卽行馳赴桂林與勞崇光會籌一切嚴堵要隘毋令逆賊竄回偵獲奸細毋致餘匪勾結賽尙阿見已移紮永州所有廣西軍務卽由該督撫悉心會議商辦其有關涉楚省事務隨時咨明賽尙阿行營庶可不致歧誤提督向榮見在桂林稱病累月竟將公事委之代理殊屬不成事體著該督傳旨飭令接印任事毋得藉詞觀望致干重咎將此由五百里諭令知之○乙巳前任河東河道總督顏以燠卒復其職予祭葬○丁未兩廣總督徐廣縉奏報馳抵

梧州勦辦波山艇匪獲勝情形得旨卿居中調度籌畫尙妥勦辦
艇匪爲目前急務而兩粵軍務大局攸關尤應及早籌維斷不
可顯此失彼各省奏摺率云不分畛域不可認作套語心內仍存
歧視又奏遵查吳文鎔張亮基原片內稱賊由新墟竄出向榮首
先遁入平南蒙 皇上不殺之恩許其帶罪立功乃猶託病偃蹇
月餘不出追賊踞永安向榮復赴營視事總統北路全軍並未聞
破一賊營擒一賊目又由永安追賊不審機宜遇賊敗衄誠如雲
南督撫臣所言惟查此兩次挫頓皆經大學士臣賽尙阿參奏恭
奉嚴旨予以處分似可毋庸再議至謂向榮帶領殘兵數十名躲
入省城自保及捏稱統帶大兵閒道赴援一節查逆匪攻撲桂林
實由賽尙阿飛派向榮赴援該提臣帶領親兵數十人由閒道先
行馳入省城大兵隨後趕到逆匪圍攻文昌門最急向榮獨守此

門其親兵皆有中毆傷亡者該提臣指揮備禦始克保全此廣西人士所共見其間平情而論新墟古東兩戰損兵折將之罪固不容寬而馳援桂林捍衛保障之功亦不可掩見在向榮在省養病臣在高州詢之總兵福興知其素有氣痛之證想因守城積勞舊病復發似尙非託故遷延相應請旨嚴飭向榮激發天良力除惡習仰體棄瑕錄用之厚恩勉圖報效至向榮在今日諸將中似尙可供驅策批已有旨令該提督出省援勦應再行嚴飭之時俟朕酌度○先是福建巡撫王懿德奏籌行鈔法以濟急需命軍機大臣會同戶部議奏至是奏稱民間行用鋪戶銀錢各票乃取銀取錢之據若用鈔則鈔卽爲銀鈔卽爲錢鋪戶各票之持以取銀錢者不同必致民情不信滯礙難行該撫所請改行鈔法之說應毋庸議報聞○戊申諭內閣給事中袁甲三奏參定郡王載銓刑

部尙書恆春侍郎書元各摺片著載銓恆春書元卽日赴軍機處
閱看原奏各案所參情節明白回奏至該給事中所稱載銓廣收
門生一節著卽指實具奏毋得稍有含混○是月貸江蘇蘇松等
屬幫丁銀穀湖南乾州等五廳縣屯丁穀石緩徵雲南黑鹽井竈
商應解續捐銀展緩江蘇海州等四州縣被水地方山東濮州等
十五州縣衛被旱被雹莊屯新舊額賦免浙江海南等四十八州
縣衛被災緩徵銀米